

# বিজিবি দিবস -২০১৭ উপলক্ষে কুচকাওয়াজ

ভাষণ

মাননীয় প্রধানমন্ত্রী

শেখ হাসিনা

বিজিবি সদর দপ্তর, পিলখানা, ঢাকা, বুধবার, ০৬ পৌষ ১৪২৪, ২০ ডিসেম্বর, ২০১৭

বিসমিল্লাহির রাহমানির রাহিম

সহকর্মীবৃন্দ,  
বিজিবি'র মহাপরিচালক,  
কর্মকর্তা এবং সদস্যবৃন্দ,  
সমাগত সুধিবৃন্দ।

**আসসালামু আলাইকুম।**

বর্ডার গার্ড বাংলাদেশ (বিজিবি) দিবস-২০১৭ উপলক্ষে উপস্থিত সবাইকে আমার আন্তরিক শুভেচ্ছা ও অভিনন্দন।

ডিসেম্বর আমাদের বিজয়ের মাস। মহান বিজয়ের মাসে আমি গভীর শ্রদ্ধার সাথে স্মরণ করছি সর্বকালের সর্বশ্রেষ্ঠ বাঙালি জাতির পিতা বঙ্গবন্ধু শেখ মুজিবুর রহমানকে। যাঁর বলিষ্ঠ নেতৃত্বে দীর্ঘ ২৩ বছরের রাজনৈতিক সংগ্রাম ও রক্তক্ষয়ী মুক্তিযুদ্ধের পর বাঙালি জাতি ১৯৭১ সালের ১৬ ডিসেম্বর চূড়ান্ত বিজয় অর্জন করে।

আমি স্মরণ করছি জাতীয় চারনেতাকে। শ্রদ্ধা জানাচ্ছি মুক্তিযুদ্ধের ৩০ লাখ শহীদ এবং ২ লাখ নির্যাতিত মা-বোনকে। যুদ্ধাহত মুক্তিযোদ্ধা এবং শহীদ পরিবারের সদস্যদের প্রতি গভীর সমবেদনা জানাচ্ছি। বীর মুক্তিযোদ্ধাদের জানাচ্ছি আন্তরিক শুভেচ্ছা।

মুক্তিযুদ্ধে আত্মত্যাগ বিবেচনায় বর্ডার গার্ড বাংলাদেশ একটি গৌরবোজ্জ্বল প্রতিষ্ঠান। এই বাহিনী ২শ' ২২ বছরের ঐতিহ্যমন্ডিত। ১৭৯৫ সালে রামগড় লোকাল ব্যাটালিয়ন নামে প্রথম গড়ে তোলা হয় এই বাহিনী। সময়ের ব্যবধান ও ভৌগোলিক পরিবর্তনের কারণে নানান নামে দায়িত্ব পালনের পর এখন বিজিবি নামে সীমান্তরক্ষী বাহিনী হিসাবে কাজ করছে।

সর্বকালের সর্বশ্রেষ্ঠ বাঙালি, জাতির পিতা বঙ্গবন্ধু শেখ মুজিবুর রহমানের আহ্বানে সাড়া দিয়ে মুক্তিযুদ্ধ শুরুর প্রথম প্রহরেই এই বাহিনীর সদস্যরা পাকসেনাদের প্রতিরোধে নামে। ১৯৭১'র ২৬শে মার্চের প্রথম প্রহরে পিলখানা থেকে তৎকালীন ইপিআরের বেতার কর্মীরা বঙ্গবন্ধুর স্বাধীনতার ঘোষণা ওয়্যারলেসের মাধ্যমে দেশের প্রত্যন্ত অঞ্চলে পৌঁছে দেয়।

জাতির পিতা ২৩ বছরের সংগ্রামে বাঙালি জাতিকে মুক্তির চেতনায় প্রস্তুত করে স্বাধীনতা সংগ্রামের ডাক দেন। জাতির পিতার স্বাধীনতার ঘোষণা তৎকালীন ইপিআর প্রচার করায় পাকবাহিনীর হাতে প্রাণ দেন ইপিআর'র সুবেদার মেজর শওকত আলী।

ইপিআর'র প্রায় সাড়ে ১২ হাজার বাঙালি সৈনিক সরাসরি মুক্তিযুদ্ধে অংশ নেন এবং ৮শ' ১৭ জন শাহাদত বরণ করেন। ইপিআর'র দু'জন বীরশ্রেষ্ঠ শহীদ ল্যান্স নায়েক নুর মোহাম্মদ শেখ এবং শহীদ ল্যান্স নায়েক মুন্সী আব্দুর রউফ আমাদের গর্বের প্রতীক।

ইপিআরের ৮ জন বীর উত্তম, ৩২ জন বীর বিক্রম এবং ৭৭ জন বীর প্রতীক মুক্তিযুদ্ধে বীরত্ব প্রদর্শন করে বিজিবি'র ইতিহাস সমৃদ্ধ করেছেন। আমি তাদের সকলের অবদানকে শ্রদ্ধার সাথে স্মরণ করছি এবং শহীদদের আত্মার মাগফিরাত কামনা করছি।

জাতির জনক বঙ্গবন্ধু শেখ মুজিবুর রহমান ১৯৭৩ সালের ৮ জানুয়ারি পিলখানায় তৎকালীন বাংলাদেশ রাইফেলস'র (বিডিআর) ১ম ব্যাচের শিক্ষা সমাপনী কুচকাওয়াজে অভিভাবদন গ্রহণ করেন। তিনি এ বাহিনীকে যুগোপযোগী করে গড়ে তুলতে অনেক কার্যক্রম হাতে নেন।

২০০৯ সালের ৬ জানুয়ারি আমরা সরকার গঠনের ১ মাস ১৯ দিনের মাথায়, ২৫ ও ২৬ ফেব্রুয়ারি বিডিআর এ অনাকাঙ্ক্ষিত ঘটনা ঘটে। যা দ্রুত সমাধান করে আমরা নতুন আইন করি। বর্ডার গার্ড বাংলাদেশ পুনর্গঠন করি। তৎকালীন বিডিআর'র ট্রাজিক ঘটনায় শহীদ ৫৭ জন চৌকস সেনা কর্মকর্তাসহ সকল শহীদদের প্রতি শ্রদ্ধা জানাচ্ছি।

বিজিবি'র সদস্য হিসেবে আপনাদের আনুগত্য ও বিশ্বস্ততা প্রশংসনীয়। কর্মকর্তা ও সদস্যদের মধ্যে পারস্পরিক আস্থা ও শ্রদ্ধাবোধ, শৃঙ্খলাবোধ, মানবিকতা, এবং সর্বোপরি পারস্পরিক সহানুভূতিশীলতাই এই বাহিনীর বন্ধন দৃঢ়তর করবে।

এখানে এসে নতুন পরিবেশ ও সুশৃঙ্খল আয়োজনে আমি মুগ্ধ। ভবিষ্যতে সবাই বাহিনীর নিজস্ব শৃঙ্খলার বিষয়টি ভালভাবে জেনে নিবে এবং চর্চা করবে।

গত জাতীয় নির্বাচনের পূর্বে ও পরবর্তী সময়ে রাজনৈতিক সহিংসতা, সন্ত্রাসী কর্মকান্ড প্রতিরোধ, আইন-শৃঙ্খলা পরিস্থিতি নিয়ন্ত্রণ এবং জনসাধারণের জান-মাল রক্ষায় আপনারা দায়িত্বশীলতার পরিচয় দিয়েছেন।

একাত্তরের পরাজিত শক্তি ও তাদের দোসরদের পরিকল্পিত টানা অবরোধে গাড়ি ভাংচুর এবং চলন্ত গাড়ীতে পেট্রোল বোমায় জীবন্ত মানুষকে পুড়িয়ে হত্যাসহ দেশ অচলের ষড়যন্ত্র চালিয়েছিল। আপনারা অক্লান্ত পরিশ্রমে তা বানচালে সক্ষম হন। সাম্প্রতিক রোহিঙ্গা সমস্যা, মায়ানমার সীমান্তে উত্তেজনা, রামুর বৌদ্ধ পল্লীর নিরাপত্তা ও পুনর্বাসন, পার্বত্য এলাকায় অস্থিতিশীল পরিস্থিতি, ছিটমহল বাসীকে পুনর্বাসনে আপনাদের পদক্ষেপ বিজিবি'র সুনাম ও মর্যাদাকে বৃদ্ধি করেছে।

বিজিবি'র সদস্যদের দক্ষতা বৃদ্ধি, পেশাদারিত্ব তৈরী, জোয়ানদের আবাসনসহ সার্বিক উন্নয়নে আমার সরকার অনেক কার্যক্রম বাস্তবায়ন করেছে।

- সীমান্ত রক্ষী বাহিনীর আধুনিকায়নে আমরা বর্ডার গার্ড বাংলাদেশ আইন-২০১০ পাশ করেছি। আইন অনুযায়ী বাহিনীর আধুনিকীকরণের কাজ সম্পন্ন করেছি।
- ভারত এবং মায়ানমারের ন্যায় সীমান্তবর্তী বাংলাদেশ অংশেও সর্বমোট ৩ হাজার ১৬৭ কিঃ মিঃ রিং রোড নির্মাণের পরিকল্পনা গ্রহণ করা হয়েছে।
- মায়ানমার সৃষ্ট পরিস্থিতিতে বাংলাদেশ-মায়ানমার সীমান্তে বিজিবি'র নতুন রিজিয়ন গঠনসহ অতিরিক্ত ২৫ প্লাটুন জনবল বৃদ্ধি করা হয়েছে।
- মায়ানমার হতে আগত রোহিঙ্গাদের নিরাপত্তা, চিকিৎসা সেবা, রিলিফ প্রদান এবং রেজিস্ট্রেশন কার্যক্রমসহ সাময়িক পুনর্বাসন প্রক্রিয়ায় বিজিবি অগ্রণী ভূমিকা পালন করছে।
- বিজিবি'র কাঠামোতে জনবলের প্রাধিকার পূর্বের চেয়ে ৮ হাজার ৬শ' ৬২ জন বৃদ্ধি করা হয়েছে। ৪৪ হাজার থেকে বর্তমানে দাঁড়িয়েছে সাড়ে ৫২ হাজারে।
- সীমান্তে সক্ষমতা বাড়াতে ২০০৯ সাল থেকে বিজিবিতে ২০ হাজারের বেশী লোক নিয়োগ করা হয়েছে।
- বিজিবি সর্ব প্রথম ডিজিটাল পদ্ধতি অনুসরণ করে স্বচ্ছতার সাথে লোক ভর্তি কার্যক্রম চালাচ্ছে।
- সরকার বিজিবি'র সদস্যদের কোম্পানী পর্যায়ে ১টি করে যানবাহনের প্রাধিকার দিয়েছে।
- বিজিবি'র অপারেশন জোরদারে ২৬টি ডাবল কেবিন পিকআপ অনুমোদন করেছে।
- দ্রুত টহল লক্ষে প্রতিটি বিওপিতে ৪টি মোটর সাইকেলের প্রাধিকার নির্ধারিত হয়। ১ হাজার ৪ শ' মোটর সাইকেল সরবরাহ করেছে।
- বাংলাদেশ-ভারত সীমান্তে ৯শ' ৩৫ কিঃমি এবং বাংলাদেশ-মিয়ানমার সীমান্তে ২শ' ৮৫ কিঃমি সড়ক প্রকল্প বিবেচনাধীন।
- অধিক দূরত্বের বিওপি'র মধ্যবর্তী স্থানে ১শ' ২৮টি বর্ডার সেন্টি পোস্ট (বিএসপি) নির্মাণ সম্পন্ন।
- আরও ১শ' ২৪টি বিএসপি নির্মাণ করা হবে।
- বাংলাদেশ-ভারত এবং বাংলাদেশ-মায়ানমার সীমান্তের পার্বত্য অঞ্চলে ৪৭৯ কিঃমি সীমান্ত পাহারায় ২টি সেক্টর, ৫ টি ব্যাটালিয়ন এবং ৯২টি বিওপি স্থাপন চলছে।
- বিজিবি'র জন্য প্রথম ভাসমান বিওপি নির্মাণ করে দুর্গম সুন্দরবন রক্ষার ব্যবস্থা করেছে।
- আমার সরকার আপনাদের সীমান্ত ভাতা মূল বেতনের শতকরা ৩০ ভাগ বৃদ্ধি করেছে। আপনারা পূর্বে ৩শ' ৩৮ টাকা হারে মাসিক সীমান্ত ভাতা পেতেন, যা এখন অনেক বেড়েছে।
- আপনাদের বাৎসরিক অর্জিত ছুটি ২ মাস ভোগের আবেদন করেছিলেন যা আমি অনুমোদন দিয়েছি। ছুটিতে গমন কালে ২ মাসের বেতন-ভাতা অগ্রীম পাচ্ছেন।
- আমি বিজিবি'র জুনিয়র কর্মকর্তাদের পদমর্যাদা দ্বিতীয় শ্রেণীতে উন্নীত করেছি। পূর্বে যা ৩য় শ্রেণী ছিল।

- আপনাদের পারিবারিক রেশন ৬০ ভাগ থেকে ১০০ ভাগে উন্নীত করেছি। বিজিবি সদস্যের সন্তানদের ২২ বছরের পরিবর্তে ২৫ বছর বয়স পর্যন্ত রেশন দিচ্ছি। তাদের প্রতিবন্ধী সন্তানদের সম্পূর্ণ চাকুরীকাল রেশন দিচ্ছি। আপনাদের সন্তানদের তিন বছর থেকেই পূর্ণ স্কেলে রেশন দেওয়া হচ্ছে।
- বিজিবি সদস্যদের জন্য আমি ৪টি ক্যাটাগরিতে পদক প্রবর্তন করেছে। যা আগে ছিল মাত্র দু’টি ক্যাটাগরিতে। একই সাথে মোট পদকের সংখ্যা ৬০টিতে উন্নীত করা হয়। এছাড়াও অন্যান্য ১০ প্রকারের পদক ও বিতরণের প্রবর্তন করা হয়েছে।
- বিজিবি সদস্যদের জন্য বুলেট প্রুফ জ্যাকেট ও হেলমেটের ব্যবস্থা করা হয়েছে।
- কমব্যাট ড্রেস ও অফিস ড্রেস ৩ সেটের পরিবর্তে ৪ সেট দেওয়া হচ্ছে। অফিসারদের জন্য ‘সার্ভিস ড্রেস’ প্রবর্তন করা হয়েছে।
- দেশব্যাপী ১শ’ ৮০টি বিওপিতে সুপেয় পানি সরবরাহ করা হচ্ছে। নতুন ৪টি ওয়াটার ট্রিটমেন্ট প্লান্ট দেওয়া হয়েছে। নীলডুমুর ব্যাটালিয়নে পানিবাহী বিশেষ নৌযান সরবরাহ করা হয়েছে।
- আমরা বিদ্যুৎবিহীন ৩শ’ ৩৩ টি বিওপিতে সৌর বিদ্যুৎের ব্যবস্থা করেছি।
- অবসরপ্রাপ্ত সদস্য এবং মুক্তিযোদ্ধা সদস্য এবং তাদের পরিবারও বিজিবি হাসপাতালে চিকিৎসা নিচ্ছেন।
- দীর্ঘদিন থেমে থাকা বিজিবি সদস্যদের টাইম স্কেল, বেতন সমতাকরণ ও পেনশন পুনরায় দিচ্ছি।
- ৩৩ হাজার ৮শ’ ৪৫ জন বিজিবি সদস্যের টাইম স্কেল প্রদান করেছি। অবশিষ্ট সদস্যদের টাইম স্কেল দেওয়া হবে।
- বিজিবি সন্তানদের লেখা-পড়ার জন্য বিজিবি ছাত্রাবাস এবং ছাত্রীনিবাস নির্মাণ করেছি।
- ‘সীমান্ত ব্যাংক’ প্রতিষ্ঠা করা হয়েছে।
- সীমান্তবর্তী এলাকায় নারী সংক্রান্ত বিষয়ে দেখাশুনা এবং নারীর ক্ষমতায়নের জন্য বিজিবি’তে নারী সৈনিক নিয়োগ দেওয়া হচ্ছে।

সীমান্ত রক্ষা, অভ্যন্তরীণ আইন শৃঙ্খলা রক্ষা এবং প্রাকৃতিক কিংবা সামাজিক যে কোন দুর্যোগে বিজিবি জাতির আস্থার ঠিকানা। এ জন্য বিজিবি মহাপরিচালকসহ আপনাদের সবাইকে আন্তরিক ধন্যবাদ ও অভিনন্দন জানাচ্ছি।

আপনারা সকলে দেশপ্রেম, সততা ও শৃঙ্খলার সাথে নিজ দায়িত্ব পালন করবেন। বিজিবি’র উন্নয়নের ধারাবাহিকতা রাখতে সরকারের সহযোগিতা অব্যাহত থাকবে। সবাইকে ধন্যবাদ।

খোদা হাফেজ।

জয় বাংলা, জয় বঙ্গবন্ধু  
বাংলাদেশ চিরজীবী হোক।

...